

四庫全書

集部

欽定四庫全書

新安文獻志卷九十七

明 程敏政 撰

行實 材武

新安節士俞君

士英

墓誌銘

李

祁

俞氏為新安世族其初由黃墩徙婺源之長田原凡三徙不出婺源其後自婺源徙休寧之宏衝坦凡再徙乃居溪西是為溪西俞氏俞氏之先自唐三府君而下世有令人有擢進士科登顯仕者有以武舉得寵秩者又

有以聯姻貴戚領三鎮節度使者其他或以世賞膺爵
或以異等入官或豐貲厚產或肥遯高蹈累累具載家
乘至節士蓋二十有四世矣節士名士英字服膺以大
德癸卯正月六日生幼知讀書稍長能為詩賦性謹厚
事父母以孝聞處鄉黨宗族稱為善良平居終日言不
及生產勢利惟務教子習學業事耕稼遇姻戚友朋至
則款曲談笑吟咏至夜不倦家事悉付閭內一不以介
丁懷至正壬辰四方兵事競起羣盜合黨攻陷城邑婺

源諸縣鄉井遭蹂躪蕩覆無遺獨溪西處深阻得不相
及者四年男耕女織晏然如承平時至乙未冬十有二
月二十有六日蘄黃寇再陷婺源勢且旦暮相及節士
攘袂奮臂而起曰事急矣吾可以坐受斃乎于時徽州
路府判兼僉浙東帥府事汪同領義兵駐開化節士遂
裹糧詣其軍陳賊形勢請亟遣兵來殺賊救鄉里且謀
復婺源於是汪帥兵以丙申正月十一日度白濟嶺抵
婺源之中平遇賊乘勝肆暴橫戾不可支遂卷甲還開

化民大失望節士迺率子姪結鄉曲募義勇屯于馬金
嶺期以杜賊障鄉里十六日賊至馬嶺與賊交戰大捷
明日賊復大至凡四戰力不敵衆遂潰節士仍力戰以
死時年五十有四以辛丑秋八月葬婺源考川青蓮寺
之後葬後又五年其仲子榮來鎮永新乃請予為銘其
墓予觀節士當太平盛時逸居而僻處無所營於世恂
恂以善良稱此固他人所可能者及其攘袂奮臂而起
志在殺賊竟蹈白刃以死忠憤激烈見義勇為夫豈小

丈夫所能哉況當時之為守為令以莅民者為軍帥以司備禦者為方伯連率以身任藩閫之重者皆受國厚恩宜有以為報而率不能死戰以捍賊至有望風奔潰不能與賊交一鋒者視節士何如哉節士起布衣無一民一社之責特以忠義憤發欲殺賊以保障其鄉里且欲因是以復婺源事雖不就而志則可稱吾故謂使節士得守一城專一職則必能捍禦無有貳志一有不幸猶當罵賊而死必不肯含糊渙忍以苟其生而已也節

士娶同縣山斗程知縣傳之女孫生三男長天保仲曰
榮季曰華天保華皆謹重能世其業榮尤慷慨達事變
以材識見用于時嘗別建青蓮寺於節士之墓左而買
田以供祠祀為之銘曰

惟皇降衷若有恒性見義忘軀見危授命嗟嗟節士遭
時孔艱邑里震蕩煙塵浩漫其來蜂喧其聚蟻集如狼
斯貪如虺斯螫騰山踔空孰窺其蹤侃侃節士挺戈與
從扼其要衝據我巖阻率我子弟鄉曲鄰伍戰既大捷

賊疲困休旦復來集亘彌陵丘以我孤羸敵彼羣醜雖
有智能莫措其手嗟嗟節士竟捐其軀功雖不足義則
有餘古之君子所徇者義成功在天死亦何愧匪爵曷

謚匪德曷銘我作銘詩用昭德馨

新安志俞榮字子茂
更名茂元末領父衆

從院判汪同輯寧郡邑後附國朝累從征伐授永新千
戶洪武初賜誥曰朕用武以定四方建衛以司戎政必
選智勇之士以領千兵俞茂早以文名深通武畧新安
來附從取婺源即戍其地既收敵寨復擒嚴陵嘗錄其
功授之以職及靖三衛定德興克樂平其績遂著繼而
江右列郡以次廓清還守南昌力却外侮擊鄱陽平章
貢連營俱拔安福亦寧十年之間功效為多朕甚嘉焉
維此永新重地爾嘗宣戰守之勞是用晉陞俾之往鎮

欽定四庫全書

卷九十七

爾其均勞佚以撫衆士嚴戍守以贊列營益展勤能以期來效可武德將軍守禦永新千戶所正千戶

程義民 兼善 錄

陳儼

程兼善字士達徽之休寧人篠堂道人其自號也兼善少有大志去家二里許篠堂山上有蘭若幽門可為藏修地率同志十人讀書于此有疑難則質問老儒朱升至正十二年壬辰四月斬黃紅巾攻陷郡縣是年六月有孫普哲者其父事元為縣尹嫉憤為寇所擄策無所出兼善乃相與起義得里中敢死者數百人直抵徽城

擊賊不勝死焉兼善幼穎悟事親孝交友信凡遇宗親鄉里有疾病患難者援之惟恐後善談論古人成敗聽者忘倦詩詞清新膾炙人口遇害時年二十六有一子仁發方四歲母徐氏撫育之國朝洪武四年邑令禮羅克邑庠訓導每得父之遺墨隻字則慟哭不能正視尤痛父遭時不造莫遂卒業于篠堂抱恨終天請友人吳和作篠堂圖復懼歲久泯沒無聞屬老友陳新述其顛末以貽後裔按程氏自晉元帝時元譚守新安有功德

於民代還百姓請留遂賜田宅于歛居黃墩十三世孫
靈洗謚忠壯廟食茲土忠壯公十四世孫灃當黃巢亂
鄉里推為岩將依東密為岩協力戰守吳王楊行密表
灃為副兵馬統帥檢校御史中丞兼領馬金嶺防拓等
事號都使灃八世孫珙登紹興四年進士第累官端明
殿學士致仕兼善內翰五世孫歛之師山處士鄭玉元
季以節死嘗欲為兼善輩撰義民錄未及脫藁惜哉贊
曰程為著姓子孫蕃衍作郡立祠源深流遠桓桓岩將

保障州里內翰利民世濟其美偉哉士達奮義而死其名孔彰實由賢子繪畫為圖志同刻木崇祀篠堂有光宗族

吳萬戶

訥傳

朱同

吳萬戶訥字克敏休寧忠孝鄉人父禮至正末為廉州推官瀕海隣郡兵起禮獨署事團練義卒保障一州以功陞欽州總管海南海北道元帥守欽州十年卒訥不便於言而負才略倜儻不肯下人從父收五溪洞蠻學

兵法習騎射至正末斬黃盜破徽州待制鄭玉前進士
楊維禎薦其才於浙省授建德路判官兼義兵萬戶與
元帥李克魯會諸軍于昱嶺闕復徽州維禎以文送之
勉以張睢陽事歲丁酉天兵臨郡元帥鄧愈胡大海等
自績溪進兵徽州守將巴爾斯布哈及訥拒戰為大海
所敗訥與元帥阿勒呼木退屯遂安札溪源巡邏至界首
白際嶺復與大海遇戰敗不屈自刎死時年二十七訥
詩豪邁不羈與維禎相出入有集五卷

送萬戶吳克敏
統兵復徽城序

予讀唐張巡傳未嘗不奇巡之才勇忠義得於天性非一時流輩所能及也當安史之亂天下承平日久士之習文墨議論者不知有名節風尚哥舒翰以潼關降房琯以陳濤敗巡以一書生不勝其憤率罷散之卒保丈尺之城屹然砥柱中流以截滔天之勢非其才勇忠義得於天性者能爾乎至今英風盛烈萬古猶一日也方今紅巾起淮泗蔓延江淞不啻安史之亂也所過郡縣城邑無不披靡任閫外之寄者往往回撓顛頓如翰如瑄者不少也忠義勇烈如巡者果獨無其人哉新安吳克敏氏去年冬謁予七者察出其所為書詩凡若干首知其有志當世者予奇其人猶未識其善武事適垣府相臣招致名士講及三關之事克敏聞之慨然有擊楫中流之志無幾當路者以名薦相臣素聞其人遂命統士若干會諸軍于昱關予聞而益奇之其才勇忠義實有得于天性如巡者則知嚮所為詩皆筆續之餘耳以克敏之文武才勇而又遇知己如相臣者克敏當以古

人自期以古人自期舍巡奚屬哉於其別予而去予以巡事告之至正十四年三月十有一日李黼榜老進士會稽楊維禎在錢唐之抱遺閣寫

元忠翊校尉十字路萬戶府鎮撫金公震祖行

狀

金符午

嗚呼先公之行人無所不知而知之深者莫翰林朱公允升若也嘗以公之行實自任顧當瀕洞之秋東西奔竄隱顯殊途莫之遂耳今朋傳凋落已盡無可復諉謹以耳目之所睹記者撫拾一二以幸不泯焉吾金氏自

七府君而至顯祖總管公四百餘年潛德幽光則有前
進士弘齋曹先生東阜陳先生師山鄭先生所為先世
誌銘行實在公總管長子諱震祖字實賜晚號柴扉幼
穎悟母夫人汪氏江南諸道行臺監察御史良臣女家
法嚴肅教公必循規矩甫七歲從東阜先生受小學即
成誦十三治尚書十五習舉業又受易於雲峰胡先生
繼晷焚膏弗得弗措公以講學居宿於外忽見妖祟逼
近牀幃公叱而拒之因失聲喪志良醫莫治乃移寢朝

陽樓調治數載一夕夢羽衣道士謂曰子疾非世七劑可療吾以還丹相遺可拜服之又長吟三十六年如夢覺百千萬里得官歸之句而去既覺舉身流汗聲已清而神已爽矣至元二年乃思夢中之句幡然走上都朝之賢士一見器薦之太史院從丞相太師秦王達爾罕深入朔漠屢奏奇勲宣授忠翊校尉平江十字路萬戶府鎮撫既領戎樞勤于職事正身率物不雷同不阿比於是廉者敬之貪者忌矣是時元運將墮紀綱漸紊歲

入蘆柴三萬議隱三之一焉公俛首不言退而歎曰竊位苟祿欺君辱身吾不為也委疾東歸後同僚皆以是獲譴朝廷以大慶覃恩加贈父武略將軍江浙等處行中書省副都鎮撫飛騎尉休寧縣男母汪氏休寧縣君于時季父太保府叅軍亦以疾留家朱紫滿門黃夫人年已八十尚康強武略公曰山居無以為養杭有第宅亦猶家也乃與叅軍奉太夫人遊武林居小清河坊又營別墅於西山一日宴湖舫與浙西廉副九聖努酒後

有言公告武略曰視彼辭色必有後憂未幾果被中傷
憤鬱成疾而卒公不遑寧處欲即往直而以襄事未終
乃走書故友聞于上隨加竄殛而下制褒揚武略之誣
公遂無祿仕心以柴扉自號禮聘婺源貢士王伯宣州
判朱克正下帷以教子孫汪伯會朱風林鄭師山趙東
山諸老儒則相與譚禮樂說詩書以師表後進無何兵
起蘄黃蔓延郡縣故家大族不能自存公曰太平日久
民不知兵若望風逃竄適為賊資甚非保全身家之道

乃率鄉人教以捍禦之法賊至二十八次皆賴公謀畫以濟又有賊帥項奴兒勢尤猖獗所過殘滅脅降公子申糾率義旅為官軍耳目生擒項奴兒及渠魁數十人獻轅門公避兵石門山中後往嚴陵晦跡安處者五年及平章薩木巴勒統大軍克復聘公守本郡治中總管鄭傳翼等保章有云器識宏遠智略淵深如准所言相與咨詢講究其於治政之方撫綏之道必有所裨又云練達時宜深諳韜略若令復親戎務必能展其雄才公雖

奉命固辭不就及論申前獲賊功授七品秩公曰兒年少暴得大名不祥辭之再三平章嘉之達于朝奉詔命江西行省宣使巴爾斯巴哈旌表金氏忠義之門尋蒙優恤云金鎮撫父子捐生報國殄賊安民既施忠義於一時安忍流移于旁郡如將本官常加優恤庶幾激勸於將來其見重於時若此後入汪源虎跑之谷引泉為池依岩為屋扁曰樵隱因以為號若將終身焉壬寅二月十一日忽整衣冠僕御以出歷故居由石田抵陽干凡

在親族乍見公至驚喜相迎至暮乃歸猶弄孫嬉戲端坐寢榻奄然而逝嗚呼公初娶考水胡同知槃溪女資賄甚盛而未有出贈休寧縣君葬與姑汪氏同穴再張氏杜氏徐氏三男長符午張氏生襲公爵授千戶次符申杜氏生以討賊功授寧國等處權茶副提舉三符丑徐氏生以賢良孝悌舉授山西大同府同知五女長適元貢士句容縣教諭戴尚文次適縣南朱州判孫彥修三適婺源元財賦總管汪某孫士占四適黟蕭縣知縣

汪成德季子思傑五適市南汪文達孫三人賞延楚府
典儀慶延可延公生大德己亥九月十五日夜至正壬
寅二月十一日壽六十四以洪武七年甲寅葬倪干松
林下山惟公雄才大略豐功盛德孤不能形容萬一但
次第其所見者于右以求大手筆而發揚之耳孤子符
午泣血拜書

趙東山贈金彥直授官序至正十二年江浙行省平章榮祿公總大兵勦羣盜於常

湖進復廣德轉定徽州而吾邑人前鎮守平江路萬戶府鎮撫金侯賓賜之子申彥直以生得渠帥功授官寧國等處推茶副提舉人皆曰彥直少年不出鄉里取七品官一時莫及可謂榮矣而不知懸於天者有自非深

究夫本末惡可一言蔽哉國家久承平吏民不識兵革
徽治萬山間一聞盜至長幼相視不知死所侯方家居
發鄉丁從縣令守亭障又募間遠行覘賊虛實而上下
已無固志矣不可為也乃遣其二子托于遠山而獨與
中子申微服懷入官符牒與推恩宣命宵逝惟留誠家
人子弟善亡匿無為盜所汙而已俄而盜熾郡縣劫持
戮辱之變不可勝言獨不得侯所在其最後擁衆來所
過不掠民財惟索丁壯為軍即盜中呼項明威既對吏
自言名奴兒殘郡邑四十餘所者也奴兒至休寧遣其
徒求金鎮撫甚急侯不為動潛以告予曰吾義不辱有
如萬一不可脫當以計覆之禍福非所慮余時亦信其
有可為者奴兒知侯終不為屈且懼動衆心乃舍之而
侯之慮愈深矣從奴兒來有孫哲者收兵邑南里中
為里人吳相言家實殘於盜所以不死者欲得其當為
父兄報讐爾相入其言以告所善同邑諸故名家子弟
及飲一大姓得壯士可二千人期以夜掩盜不備獲項

奴兒以迎官軍既而事不效諸弟子壯士殲焉相哲皆死之始相有謀告人曰金鎮撫許我千夫矣故從之者衆時事起倉卒侯初不知也於是項奴兒者遂以其衆長驅犯會府轉陷廣德掠常湖而東俄為官軍所敗棄其衆逃來彥直方以義士領丁壯從軍因率其鄉人起而執之夫以彥直奉親避寇間闔萬狀忠義之訓久著于心其乘時一奮以攄家庭積憤固宜而余迺以為有天意者誠念此賊不授首於浙西不亡軀于廣德而率隕命於吾休寧小邑又生獲于彥直之手豈非天欲以此昭金侯父子始終志節之固而謝邑人死義者俾釋恨於九原乎盜始蠡起不相服屬惟奴兒稍傑黠為烏合所推使不見獲於斯則為諸郡之害未有已也既送官大吏奪其功以畀所私不旬日盜復攻陷郡邑遂即侯鄉里而甘心焉侯挈家逃難建德城中而平章公之兵亦至矣平章公按墮功失策之由盡得軍簿悖謬蹤跡復以功歸金氏而彥直始有權茶之命蓋首尾一歲

而事始白夫幕府書勞勢賄交黷此後世用武通患也苟非平章公明斷不惑則彥直之事將闇抑不著而並時宣力者寧不解心於效命之日乎是果非人力之所能為矣惡可謂非天也哉彥直思其先所積甚遠不以一時功多賢於人人自足當益樹勲猷以報國家而繼親志異時名譽日起爵秩愈崇則清朝賡功之典大著於天下而世之為忠義者將不惑於天人之際有所觀而勸矣

蕭縣令汪公致道

墓誌銘

汪 叡

嗚呼時哉出處之難也惟蕭縣令汪公當兵革擾攘之際從容周旋克保其家安全鄉里之民以歸于天朝終又不失祿仕歸老于家是蓋人所甚難而能優為之豈

非操心制行之有素造物者亦陰有以相之與故人陳
自新狀其行來為請墓道之銘故不辭而誌之曰公名
致道字成德吾徽之黟人也曾祖諱一龍祖諱元號傳
岩居士考諱太初俱有厚德隱不仕誌其祖墓者休寧
陳定宇先生櫟誌其考墓者前進士祁門汪克寬也母
吳氏文獻故家公自幼倜儻不羣厥考延倪仲弘先生
毅篤義方之訓與弟存心成性亦知勸勉元統甲戌公
年十六弟年十二即喪其考率先將事哀毀盡禮治喪

葬祭稟承倪先生一遵文公家禮事母盡孝道總理家
務植立戶門鄉閭稱善越十年甲辰喪其母一循故典
壬辰兵變所在剽掠乃捐家貲以保鄉里繼募義兵從
官軍復郡邑主帥李克魯上其功署黟縣簿歲丁酉天
兵南下寧河王時僉樞密院事總兵克定吾徽公即以
所部義兵散歸田里而籍其名數于有司邑令賢公之
為人具書幣禮請至仍牒委以縣簿率吏民往築郡城
晝夜盡瘁民忘其勞歲癸卯郡守李納薦于朝授滁州

全椒縣簿之官未踰年改監安慶湖池規畫有方錫報
優異中書省以才幹委覈鎮江之丹徒丹陽金壇民兵
單騎而往躬循村落召集隣戚叅詢互考實情無隱休
役而家居者諭令還戍逃亡而戶絕者官錄其產鰥寡
廢疾者削籍為民既復命洪武戊申陞知徐州蕭縣地
當南北之衝累年兵燹人民散逃下車之初竭力招懷
禮下賢俊恤孤抑強既踰時民襁負歸耕庶務咸理治
為諸縣最俄有點吏以飛語中公部使者廉公治行懲

吏奸欺而公略不自辨唯求解印南歸使者嘆曰汪知縣忠厚長者乃從其請既歸田里日以詩酒自娛散步丘園遇田夫野老笑談忘倦自號高閒野叟公之出處進退大略如此至於友愛其弟至老不異待宗族鄉里恩義無爽接朋友久而能敬初倪先生葬未得地即與其弟謀捐重貲購地于余思塢力為遷葬詳見東山趙汭先生改葬誌大抵公之接人待物忠信端慤終始不渝故人無貴賤皆聽信之鄉里稱之曰成德之排難解

紛如魯仲連望廬自訟如王彥方是蓋操心制行之有素者與公生於元之延祐己未七月十有五曰歿于洪武乙卯之十月十有二日享年五十有七葬邑南五都西村之原負壬亥面己丙是歲之十有二月十日也配李氏生延祐辛酉六月後公五年卒己未之二月二十有九日也子男三人敦禮敦義敦仁敦禮早卒敦義以故家子弟強之吏于邑坐謫壽春敦仁守先業崇拓基緒克承先志女一人適賓州同知金瑜休寧望族也既

誌之復為之銘銘曰

奚仕之艱自古乃然涇渭混合汨滴曷宣巖巖城闔播
播流泉土膏石泐獸潛鱗淵休哉惟公終始克全元之
季世兵革寇攘既完厥家以寧其鄉天兵赫臨民安厥
常聞譽已著那避譽揚出覈民兵于彼丹陽義聲昭矣
文華亦韡陞令于蕭政化敷美曾未半載民歸如市志
不終遂遄歸故里邑氓號呼如失怙恃昔率義師保聚
為宜既樂昇平民恬以熙祿仕賦畧波潰于時行義卓

卓如公者希壽終于庭生榮死哀桃溪溶溶西村北宅
山峙川流允昭厥德令德允昭縣祖豐澤膏沃光融後
盾繁碩勒之貞珉永徵無斁

處士誠齋許公

溥化

墓誌銘

汪

叔

徽郡婺源縣懷金鄉三溪里誠齋許公諱溥化字次誠
生至元丁丑十月二十九日自幼穎悟奉親孝及壯值
元綱解紐疆宇瓜分遂率義師保障鄉閭續奉省檄命
領屯兵戊戌冬太祖皇帝遣院判鄧愈取徽抵邑公乃

率衆歸附授院判汪同下管軍鎮撫董築星源翼城從
攻樂平至太陽埠軍潰庚子歲隣寇作族人被害兄商
野亦遭寇執公以財力援脫兄厄會駙馬王公克恭來
鎮仍命總戎隨征昌化宣城開設德興縣治越五年沙
汰官員定隊伍公願不仕辭歸故里銀溪築室侍兄如
嚴父駙馬公聞其操略大書以扁其堂曰庸敬先輩韓
仲濂為繪圖記其事厥後復歸舊址創小樓二間扁曰
小舫自為之記公蓄書好哦詩仲子貴安嘗編類成帙

學者稱焉尤樂善好義以資貧乏助葬娶整輯里中橋道割私田為資建義祠以祭族之無祀者番易朱公遷嘗重其舉而為記原其胄出睢陽太守遠之後遂於住近地東偏設龕立像以奉之每春首率子姪羅拜祭奠集飲而退洪武壬申以老人應詔面聽宣諭回奉督挑堰塘官民咸悅戊寅夏復之京回至當塗之鵝湖感疾於五月二十八日甲戌卒於旅舍其子奉柩歸葬里之上塢是年十二月十八庚申也享年六十二公曾祖諱

允蘭為清華務副使祖諱文福潁州屯田總管考諱元祐故不仕公娶康山鍾氏生男三人長新安不壽次貴安鈞安女一人適福臨里程文貞孫男四人瑜瑛瓌瑛琬瑛球瑛孫女七人其子貴安屬友生李公獻為狀其實來請銘弗容辭謝然觀其立心操行若此亦宜表而出之以昭示不朽遂銘之曰

本源深固歲久茂芳歲久茂芳其流則長觀諸許氏而知奕世之茂昌也哉

著存祠記著存祠者鎮撫許公祠也公世家婺源懷金鄉三溪里之

許昌生至元丁丑十月二十九日年甫冠卓犖負豪氣
值元季搶攘羣雄角逐公帥義伍保鄉閭會天兵撫安
歙郡因率衆內附遂授雄鋒奕管軍鎮撫嘗築星源城
開德興縣克復昌化宣城諸處事平謝職退休以洪武
戊寅五月二十八日卒葬里之上塢原左春坊司直郎
汪公仲魯誌其墓永樂癸未春忽神降于鄉言輒應凡
水旱疫癘禱必驗鄉之故老交謂其子推和曰爾先府
君生能保茲土沒能庇其民宜立祠以便子孫歲時薦
享抑使鄉人知所景仰焉推和爰咨于衆卜地於墓之
旁構祠肖像祠甫成禮部祠祭主事余吉祥扁曰著存
蓋取諸禮經云致愛則存致慤則著著存不忘乎心之
義中書舍人程南雲大書其額且徵言記之按周禮祠
春享也說者曰品物少文詞多之謂祠又求福曰禱得
求曰祠古者諸侯有國大夫有家皆得立廟致尊祖敬
宗之誠降及後世將相大臣得立家廟而因陋就簡之
日久類多得為而不為至于庶人勢有不得為者先正

文公有惕於此創祠堂之制使上下皆可行之其意嘉矣今其書雖存而知尊其制者亦鮮推和詩書之裔斟酌古禮立祠墓側歲時率子姓而下登降灌薦幽迥寥闊精神之所孚念慮之所及凡先公平日居處笑語嗜樂薰蒿悽愴洋洋如在莫不儼然而有見乎其位肅然而有聞乎其容聲斯著存在是矣而況先公生能澤其民死能驚動禍福之以食茲土可謂靈也已作迎送神詩遺許氏子孫及其鄉人俾歌以祀公於無窮公諱溥化字次誠號誠齋其文章事業載墓誌茲不復述其詩曰許山崔嵬兮許水洑洄孰儲其精兮毓士孔才奮興義旅兮澤彼一垓功成兮不居明哲兮保軀令始終兮裕後靈不昧兮呵嘯屢神降兮莫測禦旱乾兮疾疫嚴廟貌兮翼翼斯胎蟹兮無數子姓兮詵詵士庶兮林林仰遺風兮如在慨千載兮式欽永樂二十一年癸卯孟秋中澣翰林檢計陳壽記

奉天靖難推誠宣力武臣特進榮祿大夫柱國
中軍都督府左都督武安侯追封漳國公謚忠

毅鄭公神道碑銘

楊 榮

宣德甲寅二月乙丑奉天靖難推誠宣力武臣特進榮
祿大夫柱國中軍都督府左都督武安侯鄭公薨于大
同訃聞上嗟悼輟視朝二日遣官致祭賜棺及賻命有
司營葬追封漳國公謚忠毅某年某月某日歸葬北京
之西山婺里其子能既襲侯爵遂具公平生之槩來求

神道碑銘予嘗叨總史職不獲有辭乃為序次之曰公

諱亨世家廬州合肥

按鄭氏譜世居歙之跳石元末徙居合肥今忠毅公祖墓俱在跳石

歲時遣人上塚不絕

曾祖父五乙祖父大凡父用以公貴俱追封

武安侯曾祖母劉氏祖母張氏母英氏俱追封夫人昔

我太祖高皇帝龍興淮甸公之先君子自和州率先應

募積軍功授平陽右衛百戶陞大興衛副千戶歲癸亥

公始襲父職公天資剛毅純篤壬申出使漠北至鄂諾

河撫輯韃靼還以勞陞密雲衛指揮僉事乙卯秋太宗

文皇帝舉兵靖難命公攻薊州時都指揮馬宣城守不下公百計破克之遂生擒宣歸旋攻雄縣討直定俱大克捷陞指揮使及遼東軍圍永平上親率諸將援之公賈勇奮進敵遂披靡旋師收大寧陞北平都指揮僉事未幾戰鄭村塢克紫荆關復廣昌所向無前明年庚辰取蔚州大同大戰白溝河乘勝遂北直抵濟南陞都指揮同知滄州之役公軍北門北門芻糧所聚兩軍必爭之地公力戰破之又明年辛巳敗順德軍於深州夾河

決戰勦戮尤盛藁城西水寨連戰俱捷遂耀兵廣平略地彰德所至皆下是冬陞中軍都督僉事歲壬午從上南嚮歷取諸縣及東平汶上等堡對敵小河鏖鋒靈壁擣泗州取鎮淮渡江克金川門內難既平上正大統策勲頒爵封公武安侯階勲如前白金文綺襲衣前後賜賚不可勝計永樂癸巳夏奉命出關巡視山川險易撫輯軍士時關外軍衛統攝無紀遇有邊警猝難制敵公因奏調大同前衛帶管東勝等衛措置得宜自是各衛

皆從所隸以聽調用尋奉勅領士卒築長安嶺城規畫有方人不知勞未逾月而城成歲庚寅以來上屢親征北敵公扈從每著勞績仁宗皇帝嗣位念公舊德特命佩征西前將軍印充總兵官鎮守大同嚴斥堠固屯守敵人遠遁不敢窺邊居常以清介自將服食之奉泊如也用是下人毋擾邊境輯寧宣宗皇帝倚任尤重屢降璽書褒異之公生元至正丙申至是享年七十有九配夫人張氏子男三人長即能次熙次嘉女二人長適王

友賢次尚幼孫男一人孫女一人於戲自古帝王之興
必有才雄智勇之臣為之左右以戡靖大難垂不刊之
功故其子孫世世有爵邑與國咸休永無窮之聞焉若
公遭遇太宗竭誠効力奮不顧身崎嶇戰陣以佐助翊
戴奠安宗社迨扈從北征鎮安邊陲其奇能偉績輝映
後先者何其盛哉是宜勒銘豐碑昭示後世焉銘曰
於皇太宗有臣忠毅克殫心膂助順舉義崎嶇戰陣奮
不顧身祇奉神謀用成大勲皇帝曰吁有臣如是惟天

所生皇考所遺從征漠北屢効驅馳出鎮邊陲敵不敢
窺長安之嶺其城萬堵營之築之士不知苦盛福遐齡
逮事四朝功成不有位高不驕天不憖遺殞傷元老時
論興嗟聖情悲悼聖情悲悼慨念元功式昭褒典賜謚
追封婺里之原西山之麓鬱鬱松楸佳城是卜紀行有
史銘功有詞後百千祀視此豐碑

奉天翊衛推誠宣力武臣特進榮祿大夫柱國
定西侯追封涇國公謚武勇蔣公貴神道碑

錢溥

蔣周公之肩以國氏漢末有諱子文者淮南人仕為秣陵尉逐盜至鍾山下而亡大著靈異隆于祀典子孫散處于淮代有聞人而公其裔也然未有如公之顯者公諱貴字大富揚之江都人父從龍當元之季以義勇附太祖起淮甸洪武十一年隸燕山中護衛侍親王之國即太宗也公生有大志恒念父功屈人下甫冠即代役三十一年舉義克雄縣攻大寧戰鄭村塢取廣昌蔚州

白溝河戰勝圍濟南回取滄州戰夾河藁城克西水寨
敗敵將平安軍于肥河戰靈壁收泗州遂渡江入京師
功成論次自十夫長陞至昌國衛指揮同知後征交趾
四征沙漠敗阿魯台于九龍口洪熙元年復至大松嶺
擒殺賊衆陞都指揮僉事調掌彭城衛事宣德二年四
川松潘夷叛以公充右叅將率軍捕之首募鄉道從東
路險絕處攀緣而進賊驚曰兵從天上来邪一日戰十
數合以全勝聞賜勅有奪橋斬關如古良將之譽明年

陞都指揮同知鎮守密雲諸闕番夷復叛仍充叅將討之尋陞左軍都督僉事充副總兵公謂夷性變詐非長驅撲滅患未可弭乃大閱士連破黑虎等四十餘寨斬首千五百級生擒稱是投崖箐死者無算夷遂寧謐賜勅獎諭陞都督同知充總兵官佩平蠻將軍印鎮守其地凡事有利害悉奏罷行之就威州千戶所建州治興儒學使知所教列屯而耕易木柵以石遠近堡壘相望使知所守廩庾既足人心大安正統改元召還陞右都

督時西戎僞王阿爾台等寇甘涼邊將屢失利命公佩將軍印信督率京營五千騎征勦凡陝西及甘肅涼州等處官軍悉聽節制兵至鎮番出魚兒海子哨還時部長巴圖博囉率衆犯莊浪公命將禦之生縛博囉等百人又謀報阿爾台屯伏河西遂躡蹤倍道至亂山奮勇衝入且追且殺至石城泉斬首二百餘盡獲其馬駝衣械忽有逃奴來言阿爾台所在公議即往副將李安沮之公拔劍厲聲曰汝任邊寄肉食且數年坐視其縱橫不制尚

掉三寸舌以撓我師敢復諫者死乃策馬前馳見賊遂
整陣而前生擒男婦數十人送營謀復知其不遠令軍
士疾走至烏魯猝見敵牧馬遂約衝馬羣以鞭擊箭囊
聲驚之馬盡佚敵既失馬皆挽弓步戰不決即令衆躍
馬揮刀齊入以旗牌手督之遂大捷內擒一卒譯審自
石城泉敗衄止餘八百精勇者公得其情乃分為犄角
勢列五百騎為左右翼縱百騎登高峻疑之既遇賊夾
擊轉戰逾九十里阿爾台亦窘死西土遂寧捷聞遣中官

齎綵段白金宴勞封奉天翊衛推誠宣力武臣特進榮
祿大夫柱國定西伯食祿千二百石給世襲誥券追封
其曾祖三公祖八公父從龍皆定西伯曾祖妣楊祖妣
杜妣程皆伯夫人留鎮甘涼四年召還以雲南麓川宣
慰思任發屢寇邊六年命公充總兵官佩平蠻將軍印
賜蟒袍銀盔甲以行公與總督兵部尚書王驥至雲南
衆謂瘴發不宜進公謂尚書曰賊毒吾民甚可坐視邪
遂遣兵勦之賊勢稍却師集金齒分三路進而公與尚

書從中路合上江兵夾攻會南風大作縱火四焚矢石
俱下如雨公乃擐甲鼓勇而前賊大潰斬首十萬餘級
江流盡赤移屯騰衝賊據木籠山為連環七寨又驅象
為陣合數十萬人于馬鞍山公悉破之勢如拉朽直搗
巢穴蕩無遺氛賊父子僅以身遁凱旋詔戶部侍郎王
質持羊酒迎犒臨清至則上親慰勞遣中官賜金幣羊
酒于家擇日御奉天門設教坊樂部勞平夷功陞定西
侯三代考妣復封如其爵賊父子既遁聞被繫于緬甸

八年命公與尚書下緬取賊仍寵賜以行時緬人數報
送至而潛以金樓船載賊離五十里而不至尚書謂公
曰此給我也過江則絕我歸路且瘴癘將發不乘此而
翦之可乎於是誘緬人聽賞公則往焚其舟大戰一晝
夜其賊首已先去賊子思機發之在孟牙者亦遁去盡
俘其妻孥象馬以還破其寨二百餘處熨夷遂平九年
還上復親宴勞加祿五百石賜白金百兩綵段十表裏
楮幣一萬貫金酒器一副鞍馬一疋以寵異之公之子

雄見賊去亟率漢達官軍三十人追殺不及而賊已扼其後衆寡不敵遂自刎沈于江時年二十四其三十人亦從之死上嘉其忠勇贈懷遠將軍彭城衛指揮使十二年衛拉特遣使來朝諜者知托克托布哈及額森俟使回即分兵入寇上命公總兵禦之公至境嚴耀威武賊引去召還嘉勞甚至十四年正月二十一日忽感風疾薨於家距其生洪武庚申十一月二十九日享年七十訃聞上震悼罷朝遣禮部尚書胡濙等諭祭前後十四壇

及賜齋糧孝布明器等物追封涇國公謚武勇命工部
營兆域于榆河鄉泥井里先塋之次而以其年七月六
日葬焉既葬越月而瓦剌復寇遂有土木之變使公在
豈遽至是哉其冬以公之孫琬襲爵掌左軍都督府事
成化初佩平羌將軍印充總兵官節制甘涼諸軍既而
守備南京營中軍都督府事忠毅簡亮克繩祖武而雅
好文學達古今事變為時所倚重公葬後二十五年而
隧道之碑未立琬狀公勲績來請予雖不獲接公然慕

公威望久矣而與嗣侯交且久聞公性淳厚體貌豐偉
平居謙退如不能臨敵則奮勇敢前以一當百故起自
徒步建立殊勲追封三代列爵五等與國咸休也可不
載諸聲詩勒諸金石而使之顯示永久哉公初娶李繼
李皆贈封侯夫人子男五長義患足疾以琬封定西侯
後公七年卒次即雄次謙次讓次諫女五長適杭州前
衛指揮使李剛次適密雲衛指揮使劉容次適後府左
都督長子馮泰次適羽林前衛指揮使李秀次適富峪

衛指揮使張勇孫男五長璟蚤卒次琬曰琰曰瑾曰瑜
女五武強伯楊能會昌侯長子孫璉永庸侯長子徐昌
遵化衛指揮使張璵其壻也銘曰

皇明開天六合重輝緊維蔣公世際龍飛起自淮甸繼
奮燕山義旗所指克濟于艱天位既正屢進其職從定
交南復征迤北蠹彼元孽擾我邦垌公往禦之西涼以
寧叢爾麓邦負固連轡公復勦焉南荒以順爰自左樞
超登五爵貂蟬我我為時李郭龍章鳳詔三代同封鐵

券金書世永彌崇公之忠勇所向無敵三邊之靖式昭
帝極茂績方殷公忽長逝天子興嗟有贈有謚有祭有
葬有爵有嗣詒孫有謀以燕翼子生榮死哀時孰儷焉
公雖云歿遺風凜然榆河之鄉泥井之里琢石刻詞

以彰來裔

公孫琬字重器年十六嗣爵定西侯表謝凡五日命掌左軍都督府事英廟復辟命總府

軍官兵之隸大營者天順壬午入典宿衛今上嗣位初立十二營命統其一尋詔佩平羌將軍印總兵鎮甘肅至鎮堅堡壁嚴斥堠請和糴積邊儲佐戰守西人賴之壬辰詔還副守南京兼總操江上六事曰足舟師利器械詰姦慝備戰船嚴禁令恤病軍凡千餘言大畧謂南京國家根本長江為南京藩籬控制之道宜重諸鎮甲

午召還仍掌左府兼督十二營時災異屢見復上六事
曰預防邊釁曰保障京師曰避任禳災曰暫息操軍曰
屯田富國曰修飭戎器丙申命兼總神機營戊戌進太
子太保甲辰秋敵人入邊邊將失利詔佩征北將軍印
總京營兵往禦之至大同自野口門出考按形勢授方
任能且四遣諜覘敵敵徙帳北走乃檄諸路嚴警遣兵
援威遠平敵偏頭關遮斬十餘并獲其戰馬以聞復出
臨大邊耀兵而還上言敵益遠邊輸益困請班師許之
乙巳詔修靈濟宮命監護未成而得疾有詔加恩文武
大臣即卧內進太保兼太子太傅越明年七月十四日
卒追封涼國公謚敏毅葬都城西泥井里先塋得年五
十有五蔣氏先世雖居揚之江都遠祖實居歙之蔣家
塢嘗言于朝請下有司還其先墓田所在詔從之自號
筠清公暇即臨帖賦詩以自適賓客過從觴酌竟日所
著筠清軒集十卷奏
議二卷雜文一卷

霑益守陳公濟傳

家乘

公諱濟字伯舟休寧陳村人定宇先生櫟之從孫也少負材畧元季從鄉兵保捍鄉里丁酉天兵下徽州隸衛國公鄧愈從下江西授百戶調守永新勦平羣盜招納降附公功居多洪武十年請老以子餘慶代職十四年新平雲南朝廷記其功詔起為雲南霑益州知州優畀祿秩撫安諸夷州境大治餘慶征南歿于陣詔遣行人成名諭祭命次子彞襲陞天策衛副千戶二十九年以

屢戰有功陞清浪衛指揮僉事永樂初從征交趾卒子
忠襲正統八年征麓川歿于陣子節襲陞指揮使屢以
征苗功陞湖廣都司都指揮同知卒子景襲武昌左衛
指揮使公累世以忠勇聞墓在陳村月形原歲久為里
人侵葬族曾孫彥威聞官復之

明威將軍瀋陽中屯衛指揮僉事程公伯墓誌

銘

家乘

公諱伯字彥彰故贈兵部尚書兼大理卿諱晟府君之

中子太子少保襄毅公之弟敏政之叔父程氏世居徽之休寧出梁將軍忠壯公之後族大以蕃具程氏統宗譜及先塋之碑其居陪郭者在國初有安定忠愍侯以勲烈聞事載實錄其兄之子徵君諱杜壽尚書之考也以註誤隸尺籍于河間再世矣至襄毅公與公始奮跡文武以為其先人之光今不幸皆下世公則無憾而為其子姓者何所恃以為歸乎於是敏政聞訃為位以哭又序而刻其墓中曰公少為父母所鍾愛襄毅公親督

教之然公志武讀書之暇輒復私出與少年習騎射及諸戎事業已精而襄毅公始知之曰是亦足以顯矣正統己巳之變守臣以將才舉于朝少保錢唐于公方督諸軍事立公閱武場親試之能奏予官未上會敵入大同公上書乞自効從大將往遇賊于雷公山先登陷陣軍中以為勇分援代州與賊戰城下連日夜解其圍又以選兵劫其營于西峩口奪還其所掠授瀋陽中屯衛百戶天順戊寅襄毅公視師遼東公從至金復海蓋諸

州而還敵入陝西公復從尚書白恭敏公出固原時大雪不知敵所在公率探騎自間道覘之于紅崖川還報幕府乃發兵擣其營于達喇齊公亦生致部長一人入奏捷賜宴賚陞武略將軍副千戶四川貴州山都掌之蠻屢叛殺邊吏襄城侯李公奉詔往討而以公從時襄毅公督諸軍事公不以自驕願分隸偏裨下其豹尾箐及海納諸寨而五村峒號天險公復與敢死士連破之俘賊甚衆并獲銅鼓數十成化初凱旋陞明威將軍指

揮僉事加賜賚初公率練所部士于京營十年至是乃用薦還治衛事又十餘年而疾作矣公性易直有懷即吐不喜齷齪士人有不可面折之不忍喜飲樂遊遇文人韻士雅歌投壺必傾倒乃已然事兩尚書府君及祖母汪夫人母張夫人極孝謹受責不敢措一詞居喪泣血比于孺子襄毅公以剛聞天下公事之如父不命之坐不敢坐其待內外親婣雖甚所不足者梧杓間隨釋無宿怨其居官未嘗以朘削為事故不以田宅服用不

及人為慙此皆敏政之所親侍而知者不敢溢美以重
不敬之罪也公生宣德己酉五月十二日得壽六十以
弘治戊申二月十八日卒配劉氏封恭人子男五長敏
聰當世公官次敏芳次敏哲次敏敏宏次敏堅女五長適
大同中屯衛指揮錢鐸次適滄州守禦千戶趙瑛次適
瀋陽中屯衛指揮曹澄次適千戶舍人何玄次尚幼憶
丁未之冬敏政奉詔考士于南京還取道河間候起居
時公已屬疾執手歔歔哽不能語久之崛起呼酒相

慰勞令盡觴曰後恐不復見汝矣嗚呼言猶在耳孰謂此別而真成永訣也哉公墓在祖塋西南葬以卒之歲四月二十七日銘曰

程顯江南孰關其逢明威奮揚為北之宗北伐南征克世其武孰浚其祥忠壯維祖紆金曳紫亦孔之榮胡命之淑而不永齡奕奕崇丘瀛東之里公安于斯我悼曷已

新安文獻志卷九十七

欽定四庫全書

集部

新安文獻志卷

九十八至
一百下

詳校官中書_臣孫衡

侍讀_臣孫球覆勘

總校官庶吉士_臣倉聖脉

校對官中書_臣吳甸華

謄錄監生_臣孫大森

欽定四庫全書

新安文獻志卷九十八

明

程敏政 撰

符實

列女

歙章孝女雙廟碑

鄭 玉

按新安志歙縣人章頂二女與母程登山採桑母為虎
所攫二女呼號搏虎虎遂棄去母由是得免刺史劉贊
改一女所居合陽鄉為孝女鄉且復其家觀察使韓滉
奏贊治狀朝廷特賜褒遷事載唐史今郡城之南二十

里若橋若村若里皆以孝女得名即孝女之故居也村南五里許有山曰二姑嶺亦曰義姑嶺者孝女之廟在焉歲久廟廢嶺仍存故名予嘗過其所訪問父老猶能歷歷談孝女事為之徘徊太息不能去者久之南里洪節夫氏聞風而起慨然以為已任即村傍青山庵之前軒四楹為孝女之祠肖像其中且為買田以供香燈之費而命章氏之孫住庵曰覺旺者掌之予又得請於有司命長吏歲時致祭如我國家故事於是書其本末使

刻廟中夫以二女子之微而能制猛虎之暴豈其力之所勝哉蓋其衷誠之所感化耳方其母氏為虎所攫二女愛親之心勃然而興發為忿勇震動林谷有不期同而同者當是之時二女惟知母難之當救豈知已身為可惜故寧陷虎口而不自顧虎亦為其所化而不自知且天下之冥頑不靈者獸也獸之至暴不仁者虎也虎且化之而況於他物乎況於人乎觀於二女之事則凡人有所未信物有所未化者皆在我之衷誠有所未至

也豈人與物之罪哉千載之下想而像之二女之英烈
猶凜凜生氣況於當時乎況於親見之者乎其見褒於
朝廷得祀於鄉里不徒然也祠廟湮廢若此豈人情也
哉然則二女祠廟之復有不可已者矣自今像設方嚴
祭祀時舉過其祠下者孝愛之心油然而生婦人女子
亦將觀感而化矣其關於教化繫於人心豈細故乎因
為詩三章使歌以祀孝女并以勵風俗云詩曰

嗟弱質兮閭閻發至勇兮至仁鬼神兮威動猛獸兮服

馴山高高兮崔嵬水深深兮泚且洄山高水深兮天宇
開雙鶴交飛兮孝女來生人兮林林習俗兮日已沈仰
遺風兮如在慨千載兮良心

聶夫人墓銘

李 觀

夫人姓王氏歙州歙縣人曾祖某祖某父某蓋富家歸
于鄉人聶君世卿今為南城主簿聶君之曾王父某王
父某不仕考某贈禮部尚書兄冠卿終翰林學士凡仕
者數人族大以蕃而夫人宜之為婦孝為妻順為母愛

而不弛事姑三十年未嘗蒂芥既自治其家舉有法度
於鄰里鄉黨慶弔凶以喜以憂若在已然見人之絕
志於賙救力不足不能自己教厥子必以禮義榮辱故
克有成長男武仲進士及第其次南仲微仲恭仲皆好
學女壻程某閔某汪某亦為士季女未許嫁夫人每教
諸子曰亟自立汝後顯榮吾不見矣皇祐三年來南城
未及安宅夢人告曰爾在此二年而已五年疾病時武
仲與禮部籍奏尚克聞之已釋褐有書至不能言矣夏

四月十一日卒年若干明年某月某日載其柩還鄉以某月某日葬于某銘曰

死生命邪聖人罕言之雖其有命其可自知邪夫人教子謂不見其仕及其登科而母死矣豈知而言邪抑偶然邪二年之意形于夢寐彼何神靈而告之丁寧邪武仲有文采諸子頗聰警姑務於德以求揚名則親之魂魄其不榮且幸邪草露溥兮松風淒兮生者能幾時死者無窮期萬物皆如斯又何足悲邪

記程叔清女死節事

羅頌

始方臘來寇時歙縣人程叔清家避地於城南有女年十七父母計曰我等處此不幸則死獨此女年色方盛萬一辱於賊何以見族黨乃呼謂曰吾州之俗尤以淫為諱爾良家女也足未嘗出閨閫賊倘以兵脅爾當奈何女曰兒豈從賊者必不可當以死拒之親族又從旁審其語女因取所攜衣囊負以趨且為見執罵賊狀父母喜曰果如是真吾女也吾聞死于兵者用道家說醮

九幽則能升濟魂魄爾勿慮女笑曰諾明日散處東塘
山中女適為賊所遇賊好謂曰吾以爾歸聖公毋憂不
富貴女曰爾輩欺天害人狗彘之不若何聖公也賊脅
以刃曰不從吾言必殺若女曰我知有官府不知有賊
賊先斷其髻益以好語誘之女且唾且罵賊知不可屈
刀亂下潰其尸乃去有二兒隱旁大石下備窺見本末
為其家言之皆悲喜因葬東塘山中

汪居士夫人朱氏墓誌銘
胡 伸

夫人朱氏歆之婺源人其父曰郢大父曰維甫曾大父曰昭元皆以積善稱於鄉閭夫人未生前一月芝產于其母寢室及生遂以命之年二十三歸同邑鱣溪汪居士紹子傳有子二人長曰存公澤次曰仔公敬夫人年六十七而終後六年始卜葬吳村嶺其終也以大觀二年八月二十七日其葬則政和癸巳九月十九日也夫人為女對父母不敢嚏咳唾嚏父母衣服中裙廁牕皆自漱浣取羊若豚刲剝菹醢而進之父母食之未嘗不

既也夫人為婦事舅姑彌孝箴管之餘時其寒燠甘脆
滫瀡以待食之嘗否居士有弟七人有襁褓髻鬢者夫
人即助其姑抱哺冬裳夏葛費取其奩勞出其手春秋
享祀取大鑊小鼎刀匕樽俎必宿滌濯夜半輒興肅肅
踏踏身作享具汪氏中表時節嫁娶祭葬往復厚薄悉
如姑意居士喜儒客有過居士者夫人必議酒食或鬻
質家具而居士固莫知也夫人為母日夜勉其子以學
歸必問所與游者賢所閱書多即喜或少懈輒怒為不

食於是存游學四方貢禮部入太學周禮毛詩尚書皆
通其義因詩鳥獸草木遂推尋中國動植各物以至四
夷海外瓌形詭狀飛走榮枯之由因尚書日星山川遂
究風雨電雷霞虹霹靂怪雲變氣名山大澤瀛海天河
消息往來之理自清濁剖判之後推之至於天地未分
之前太虛天地之外存既盡得其說乃欣然曰先王制
禮一形一器精粗表裏存知其端矣又因孟子放闊邪
說則悉購百家所著之書楊齊生死何愛一毛墨守清

廟何以非樂龍困之劍黃何以堅白何以利簞取何以
不竭影飛何以不動釣何以有須海何以有裨譬如發
兵捕賊先探其穴故必一一索其言之所從起又自五
季唐隋考之至於炎黃以長歷甲子聚年月並世盛衰
品人賢愚迹其治亂興亡所以然有不喻則思思不得
則問數從予質問所疑仔少存十三歲見其兄精通益
奮勵陳書篋六經在前子史在後讀之聲琅琅然夫人
教其子如彼而二子皆能力學如此夫人之疾也自度

不能起呼子孫環立與訣神色不昏將斂發笥無綺繡靡麗之衣女兩人適里中王服之俞美成存舊與長姪借學相友善孫男四人曰仝仝奔令仝習周易孫女五人予年十四與公澤鼓篋鄱陽令餘二十年矣愈益知其為人公澤者孝友修潔人也託其友及上舍弟楚衛彥忠狀來為其母請銘於予冀以傳其後世予為之銘曰

女孝如何怡聲降氣婦順伊何日用甘旨妻順其夫母

誨其子無曰未貴有禮有義無曰逾貧有子有孫即高
大之于公之門

尚書吏部員外郎朱君孺人祝氏壙誌

朱 熹

先妣孺人祝氏徽州歙縣人其先為州大姓父諱確始
業儒有高行娶同郡喻氏以元符三年七月庚午生孺
人性仁厚端淑年十有八歸于我先君諱松字喬年姓
朱氏逮事舅姑孝謹篤至有人所難能者以先君校中

祕書賜今號及先君卒熹年才十有四孺人辛勤撫教
俾知所向不幸既長而愚不適世用貧病困蹙人所不
堪而孺人處之怡然乾道五年九月戊午卒年七十生
三男伯仲皆天熹其季也嘗為左迪功郎差充樞密院
編修官一女適右迪功郎長汀縣主簿劉子翔孫男塾
埜在女巽允皆幼越明年正月癸酉葬于建寧府建陽
縣後山天湖之陽東北距先君白水之兆百里而遠不
孝子熹號慕隕絕敢竊記壙中如此昊天罔極嗚呼痛

哉

汪母夫人呂氏墓表

汪 珙

夫人姓呂氏

闕

文仲之後故某府某

郡馬長女先皇帝簡王之外

闕

性貞

靜不樂華靡父母鍾愛之邑中汪氏亦令族

闕

譽謹於擇配夫人歸之即故將作監丞若容

季氏秘書丞若思仲兄也時舅先逝獨太恭人洪氏在堂夫人晨夕侍養不少懈補紉澣濯皆身為之尤善候

顏色順適其懽心而太恭人於夫人篤愛亦至夫人以不逮奉舅氏每春秋相祭祀灌奠盡禮或饋之蔬果時饌亦先薦然後食太恭人春秋高而秘監公又各羈宦寓門內男女夫人嫁娶如一不覺有纖毫厚薄御僮媵百餘輩使治居第生產皆秩然有序夫人於汪氏親族婚喪弔慶禮行甚謹然未嘗輒自往族有貧乏不給者遇陰雨風雪輒蹙額不樂遣蒼頭致繒絮束薪負米往遺之太恭人沒夫人哀毀踰節喪葬有禮而若虛伯仲

及除喪又即仕夫人教諸子姪甚嚴雖隆暑不冠帶不許見聘名師程課之蚤莫不少替已而諸從子居信行者曰珙登進士璜授司法叅軍澄授太湖尉夫人不為無助夫人生于貴族長于富室而歸于宦門無毫髮驕吝雍雍如也至於組紕織繡之事則率羣婢或夜分不已夫人生政和五年乙未歿淳熙三年丙申享年六十有二子三人長沆次淙次淮福州福清縣尉孫鎰錫鑄等十一人以歿之三年季冬月日奉夫人柩葬邑西中

鵠鄉叢睦坊後山之陽嗚呼夫人以孝敬事二親以聖善訓諸子以仁厚成一門是婦德母儀具美而無愧者矣引而伸之闢雉鵠巢之化豈甚相遠哉予不肖辱夫人從子念葬已久冢上之石未有刻文謹按叔愚程君狀撫其節使揭而表諸墓

程給事中母宜人胡氏墓誌銘 周必大

宜人胡氏故朝散大夫致仕程公晉之之室今給事中叔達母也徽州黟縣人其先有名育者仕晉為新安太

守因以占籍其後名星為蕭梁太常卿既沒而廟食族
系日以蕃宜人曾祖德懃祖義璇俱隱跡弗耀父獻卿
好賢樂善一鄉稱長者生五女尤憐愛宜人謂必為名
婦聞大夫早有賢譽故以歸焉程氏衣冠蟬聯與胡氏
世通婚姻大夫祖母太碩人世母咸寧郡夫人母太孺
人皆宜人近屬也始嫁翁姑高嚴娣姒如雲宜人恪共
盥饋勤劬賓祭承上接下動有法度中經亂離褚篋一
空約身縮用助大夫經理家事秋毫無妄費至資其子

宦學四方則略無所靳給事以是少年登進士第解褐歸拜重親里間咨美翱翔仕路風節議論日益有聞入佐天府大夫宜人年皆七十餘休沐必娛侍西湖上間登天竺諸山諸孫先後扶攜二老人輒却之曰吾方健汝母憂居亡何長子叔向季子叔豹相繼死宜人始忽忽不樂頗苦微恙給事亟求守通州以便養未行擢登御史府進左司諫數請外上固留之宜人亦曰吾念二子耳汝之去留我何擇焉悉心報主所以慰我心也給

事乃不敢言明年宜人竟不起實乾道元年八月二十九日壽七十有五後十四年而大夫卒宜人生三子給事其仲也二女嫁汪允迪黃珏孫男九人璿鎔鎬早世鉉從政郎荆湖北路安撫司幹辦公事錫從事郎婺州蘭溪縣主簿銛鉞俱未仕孫女十一人曾孫男五人鎮孫子八未名寧孫子六重一早夭宜人初葬縣之長遙山大夫以其地下濕別卜地於北山亭古城培之原淳熙六年八月二十九日甲寅葬焉給事之為少尹也某

備官于朝一見如故知每聞宜人慈惠肅敬四德兼樹
知古今通釋氏書常敬仰其賢又聞翁媪偕老子孫方
昌怡怡愉愉百順具備未嘗不自恨不天不復有此樂
也踰一星終復與給事直禁林侍經幃僚承華情義款
密舉朝莫擬給事每云吾父滋老欲改葬吾母而未敢
它日尚屬子銘予敬諾已而給事以直龍圖閣奉祀歸
而大夫沒書求踐言其何可食銘曰

婉婉肅莊以承尊章儉勤靜方以從其良擇隣諸祉又

燾厥子展如夫人不曰賢矣匪劬其躬孰報之豐謂或不信盍觀初終相彼新阡有原膺膺利其嗣人以奠終古

孺人陳氏墓誌銘

洪邁

休寧於新安為縣於縣有滕溪於溪之人有陳氏男盡為名人女盡嫁策策知名士故同里程承事君諱畎娶于陳得令夫人夫人處士與之女也自其幼時實能起孝敬事父母嫁移諸舅姑舅沒姑亦老夫人季於衆婦

獨身忠養之調停節適委曲至到二姒良以為弗如姑
亦曰季宜我程氏春多祠正月率朔迨晦夫人與雞俱
興湘濯亨孰必躬親乃薦賓延師資整訓諸子拊卑承
尊禮法周備東西家時節相往還人人意滿去無一退
言有負己者異時用緩急叩門稱力為之盡不以前故
芥蒂於是閨門之稱震遠近如一辭承事君申申安安
內得奇助見其子大昌名進士底聞成家承事君即世
夫人教餘子愈益力中女擇對未決大昌官太學得婺

士楊大法於諸生中歸以女曰壻如是何必嫁官人未
幾楊優入舍選將對策大廷即除官聞者證夫人賢有
識大昌由學省入佐著作祕書至駕部郎直皇子慶王
講夫人享恩封安輿就養母汪在鄉里年考高輒再歲
一歸寧他日歸駕部拜乞留留少須臾而汪以病告載
星徂南胗絮湯餌浹日而未訣爵踴驚彌如孺兒之初
去乳保曰吾不蚤侍母今舍我吾生復何憊時春秋六
十有二矣法不致毀竟以病病且篤子婦斲食肉輔病

牢不可氣息惛然逮於不能病遂以卒隆興之元年十一月二十有六日也凡六男子駕部君最長次淑昌全昌世昌道昌其最少曰文昌亦以材為博士弟子大女適朱庸李適吳輝夫人氏之喪駕部謁急府王釐尚方珍錫以賻為觀瞻者榮駕部籲哀痛中卜宅兆未得去年之秋異人感于宵夢褐衣長髯自云皇父氏來告曰有竈直艮在朱之原山川輦翔後其熾蕃而庀而役冬當獲旃覺而諱于墓師物其地地與夢協將以祥之明

日大葬駕部君哀未盡能自割以禮使來請銘曰吾母
亡矣而有不亡者壽能壽吾母者子也予與君知聞十
五年久同僚於三館為甚厚銘何說以辭其詞曰

孝敬其身之本諸賸也鄉閭我儀之善斯則也有子實
昌之天報格也耄齡不崇之壽胡嗇也卜宅誰朕之神
告嘖也矢詩以颺之詔于嘯也

夫人金氏墓誌銘

汪知言

夫人諱妙湛姓金氏徽之休寧人故吏部尚書徽猷閣

學士忠肅公之女淑人張氏所出也尚書以儒學起家
事高宗為殿中侍御史事孝宗為給事中以勁直名世
平日謹許可夫人端莊純靜肖之宜重於求配故以夫
人妻同郡歙人朝散大夫通判常州汪公擇善嫁時通
判之祖朝請大夫司農少卿總領湖廣財賦諱叔詹父
朝請大夫直秘閣知江州諱若海俱無恙總卿春秋高
多子舍日食家百口外內屬皆尊行夫人奉事唯謹不
見微有虧缺秘閣員遠略長策號有志當世者方從官

遠遊而通判兄弟終鮮得夫人當家事專致學問於書
無所不讀通判字從之新安士類于今稱數博雅放肆
下筆妙言語者必曰從之繫夫人與相其善也秘閣蚤
世姑太碩人趙氏實循王子性嚴重不可忤夫人能順
適其意事多有所濟閭政緩急之宜族黨指以為家法
太碩人晚多疾通判自輅院告歸憂不能暫去其側兩
得邑不赴上暨廟堂起公為餘杭辭不獲命夫人留侍
太碩人于家晝則忘食夜不解衣藥餌非親調不以進

以故通判紆其憂以政聲聞畿邑而太碩人亦忘其疾之屬已也計夫人無娣姒之助獨養姑者二十餘年始終猶一日又門大族衍處人之所甚難者每燕閒自如臨事倉卒整暇區處不苟無失色於喜怒不撓志於悲樂趣向莊雅服御素約與為等夷者有禮以孚其情逮下無一毫嫉忌殘忍之意卒之日疏戚貴賤哭泣之哀皆曰如夫人不可復見也子男五人長時中承直郎知鄂州嘉魚縣次時敏迪功郎寧國府涇縣主簿次時發

時尹時亮皆進士通判先夫人捐館五年而誨誘愈力
駸駸成立惜夫人不及見矣女四人長適奉議郎知處
州龍泉縣李允升次適進士程有華次適修職郎新常
德府司理叅軍朱扶次適文林郎江州瑞昌縣尉呂伯
閏夫人享年六十有四續封安人紹熙甲寅十月二十
八日寢疾于古城里第一日而逝諸孤卜慶元乙卯九
月二十五日葬于古城北塔干之源以銘來請知言敬
觀夫人行事是不可不銘銘曰

名家之娃名門之婦士賢以妻子才成母吁嗟夫人無

憾于茲新宮其闕尚永有辭

時中於墓下立祠祀公與夫人割田創庵曰崇福元

未僧易庵為寺撤其祠七世孫俊德聞官復之具周原誠記

孺人葉氏節義傳

章如愚

予頃謫南安過賢女祠閱壁記乃南康縣吳村劉氏女及笄父母許以適蔡氏已而悔之更適吳氏吳氏卒又欲復以歸蔡女曰先使我棄蔡從吳又欲從蔡是重負吾乃自沈於江而死鄉人義而祠之又觀隋李德武妻

裴淑英讀烈女傳見稱述不改嫁者乃謂所親曰不踐
二庭婦人常理何為以此載傳記乎吁人能悟此理為
常則人倫正而天下治豈非世道深幸今吾鄉葉氏女
許適程氏未及婚而程氏卒葉氏請於父往哭而為之
衰覓其親從之子為其後中外欽服州縣上其事於朝
特賜綸命曰女子生而願為之有家此人之至情也爾
生於儒門有淑其行方以身許人未諧醮禮而竟以栢
舟自誓往撫其孤歲月既深冰霜益厲真有古烈女風

朝廷雖嘗旌賞之而所以示節婦之勸者禮猶未備是用封之初品表之坊額仍下史館編摩以傳不朽貽我彤管庶以弗墜可特封孺人雖然三月而廟見稱來歸也擇日而祭於禰成婦之義也曾子問曰娶女有吉日而女死如之何孔子曰壻齊衰而弔既葬而除之夫死亦如之鄭氏曰未有期三年之恩也今葉氏雖著纓之有繫而結禭之未嘗纔諾婚於程程物故往服其衰撫其孤以終其身於禮未之前聞吁世道衰漓夫婦敵讐

者往往有之一死一生交情頓背於前日望葉氏之高風得無愧乎朝廷不吝於爵賞誠有補於風化云迪功郎史館編校文字山堂章如愚撰

曹季女述

曹涇

弘齋夙與程鄉貢一震澤民善咸淳丁卯處其館以長女許其姪英子飛其秋予再貢明年第十二月十五日辰時季女生命名曰昌以予待次昌化簿也癸酉冬長女嫁甲戌二月之官季女最幼昌也纔六歲其貌厚而

資性純明老少皆愛焉國事急乙亥正月歸丙子正月
遂革運車馬驚怵澤民挈內眷來寓予家與昌女稔喜
之既去澤民次子子魯希曾戊辰生年相次以是媒親
甲申正月澤民遷居長塘之北濬七月二十四日忽報
澤民病革是時昌子年纔十六未笄也二十七日遂行
至逾日而澤民卒矣然姑氏賢希曾賢其生母與嫂俱
賢無不安者丙戌十一月初三日戌時生男名之曹壽
己丑閏十月十一日午時女愛娘生吾女嫁早可憐得

男早可喜然去六年餘希曾病矣辛卯歲十一月十七日希顏警報至予疾走視之母妻相泣不能言予亦泣明日死矣為之膽落心碎死者固不復生一寡二孤其何以為生也賴姑氏以下俱賢吾女性資明達能識三綱之道而又堅忍故知其必能持節撫孤也去之四年為乙未歲六月十七日伯母俞氏死十一月八日姑氏死將家門之多故抑吾女命薄之遭邪吾女持守愈堅送死恤孤孝慈純篤至大德八年甲辰正月二十有四

日男壽翁即曹壽一十九歲娶矣至大元年戊申三月二十二日申時孫男曰申一生矣女愛娘許藏溪汪節推之曾孫言將結褵而吾女亦四十矣然吾女自甲申出門後十二年之間三年之喪三馬麓哀多於鮮華悲哀溢于懽娛何以堪處夫婦之聚首尾七年而第七年間始之救病繼之哭死前之怵迫憂虞後之痛楚悲結何以為懷若此者在丈夫處之尚有不能無變者吾女以一女子鐵心石肝而始終一節內外無間言不亦難

矣乎天之覆物生物信矣而日月不照覆盆雨露不入
頑石則夫自求多福者豈不自斯人之身而培之哉稽
之前聞婦人早寡有子而能守者其後昌大歐陽公四
歲而孤其母蓋三十歲聞魏公亦四歲而孤母年二十
有五夫當母寡子孤時安知其後之必昌大至於如此
然而卒至此者一則祖功宗德所積者厚次亦以厥母
之執義字子出於至誠造物蓋深憫焉而以是報之也
吾女以二十三歲而寡履艱茹苦有二氏之所無者則

天之福其後也宜何如書此付外孫壽翁謹收之世傳之以無忘乃母之義而又戰兢自持孝敬弗懈庶幾獲顯揚之實以竊附先賢之後然軒冕倘來者外物也人之所以為人求其在我者而已戊申五月十日弘齋老人述弘齋謂誰曹涇清父也今年七十五歲

程夫人齊氏墓誌銘

程文海

新安處士程鳴鳳之夫人齊氏年五十有八以至元二十有六年五月八日卒又明年十月某日葬里之長原

又二十有三年處士命其子復心請銘于鉅夫同宗也
夫人諱靜真世為鄱陽大姓祖某父某母某氏幼孤無
兄弟鞠於從父從父憐而愛之析其產半以嫁半以立
其父後為父後者弗承厥家家破并奪夫人產以自益
夫人既歸程氏或勸處士言之邑夫人止之曰從父所
以立先人後者顧以承宗祧也不幸而至於此復以我
故而罪之將如宗祧何處士曰吾意正爾乃止事後姑
盡其孝相夫子盡其順治喪祭婚嫁給賦役延名師以

教子常易盡具以濟其乏慈儉雍穆儀于內外臨終猶戒其子善事其父治喪勿用佛老嗚呼可謂賢矣子男二若水復心皆賢而文復心上四書圖說將與秩以父老引年以本郡儒學教授致仕時年六十孫男二暹遜女二長適顧某曾孫男若干人女若干人銘曰
為孝女為賢婦為慈母而早死使存也始與夫子偕八十有四而死也二十有六年吁其天乎

程孺人汪氏節孝傳

阿爾斯蘭哈雅

孺人姓汪氏諱淑正休寧西門人建寧路教授鄉之女也是為休寧縣尉陪郭程君隆之冢婦永盈倉副使忠甫之繼室孺人生而秀穎喜讀書言動必以禮及笄父母為擇所宜嫁無可意者教授夫人即縣尉女弟而忠甫妻徐氏早世因其請遂以歸焉縣尉當國初嘗傾家貲冒白刃說止屠城之師坐是中圯孺人以勤儉佐其姑何夫人竭力經理家以復振縣尉之卒也朝廷錄其功授忠甫官孺人益以清慎相之未幾忠甫卧疾間語

孺人曰先子有言餓死事極小失節事極大我如不起
子將何如孺人曰此君家法我為君家婦當死守復何
言忠甫曰若是何憾忠甫卒孺人年二十九號慟幾殞
者數四時長子一週次方乳中何夫人在堂瞽而痿有
監郡者聞孺人容德且孤苦也託媒媼探其意孺人艱
然曰我何人女何人婦敢爾相侮即前趨媒媼捽其首
撻其面爪血淋漓且大罵曰監郡風化之首而為此等
事何面目見吏民乎族黨聞之動色嘆曰烈哉雖古節

婦何以加此孺人事其姑左右扶掖隨意所適凡數年
喪盡哀祭盡禮二子稍長皆口授之詩書成誦乃遣從
塾師各為之娶婦年七十有五而終二子者長觀次峴
皆克世其業

論曰民之秉彝好是懿德固非待講之而後明督之而
後能也彼名士大夫乃欺君賣友無所不至豈非失其
本心而自絕于天之所命哉若程孺人汪氏之節孝謂
非出其天性之美不可也而況世風閭德之相成有素

哉宜其所立之卓有足以裕後而範俗者矣

孝節黃母吳夫人墓誌銘
虞集

皇慶延祐間相國李公孟以舊學得君行政時莫與並
黃一清自徽之新安來相國悅之將薦以官一清曰母
老不願仕也相國賦詩贈之如平生歡天下傳誦朝之
大夫士交為之美頌是時中書禮部用其郡縣所上狀
言黃母吳氏休寧儒士仲禮之女也年二十餘喪其夫
元珪舅姑皆在家素貧春績以為食甘旨無闕教子有

法舅沒賣已衣具葬姑病常在床或中夜痛楚呼號自
始侍病至終數十年每廢寢食猶極至愛無幾微厭倦
及喪之又甚哀今四子六孫皆成立善養憲司廉察得
實法當旌表其門下縣令表之如章一清歸相國終念
之以為杭州路教授便養母曰辛苦已分也敢謂見知
於時是相國之恩不可忘子行辭謝相國矣宣徽使王
公廷獻畫一清隱居十景圖而詠之翰林學士元公明
善在諸公中最嚴許可獨至一清母子無譏詞時人以

是異焉母常病一清夢神人授方須啗蜜疾可已山中
蜜非時不可得夜求別村道有虎為一清避去人以為
孝感母卒時年八十五子一麟一鳳一清一鶚孫曰權
聚俊晉紹勝浚為徽州路教授晉為國子伴讀母之墓
在其藍田飛鳳山銘曰

頌頌新安道義之都教存久深入遵義途岩岩五美貌
是弱孤艱極名成有表里間閭表其生墓藏其終石有
文焉所職允同

徽在江左萬山中婦人言不出柩無非
無儀吳夫人孝節以其子秋江徵君之

賢名聞京師生有陶母之風沒有韓公之銘蓋不朽矣
人子以是報親不既可乎天厯乙巳十一月甲子翰林
待制新除藝文少監
長沙歐陽玄謹識

節婦汪夫人傳

程文

夫人名悌婺源下港里程文昌女也四歲父死于兵事
母汪以孝聞伯父草庭先生憐之選嫁名家子汪德裕
生一女而寡公姑懼其不能安也使問之對曰妾不幸
夫亡尚幸公姑在得備奉養何忍更適人或勸之曰夫
人年少無子不以此時從良夫後將何悔夫人曰吾聞

女不事二夫夫天也天一而已夫死而遂去之是背天也背天不祥或又曰夫人今嫁幸而有子不猶愈於持孤身托冷室乎公姑固不汝望也何乃自苦夫人泣曰雖然吾父蚤世吾母守志數十年至今吾身一為汪家婦知死汪家而已奚恤其他里之富人因媒妁具聘幣伺間以請者數輩夫人卒不許家貧紡績自給課童奴樹藝歲時奉祭祀如夫在時公姑卒喪葬盡禮今年七十餘矣老猶執女工不倦閭里姻戚稱夫人之德無間

言初德裕從弟澤民幼附夫人夫人子畜之及澤民長乃立其子梓為德裕後以奉夫人梓事夫人益孝謹如實生已

程文曰予從閣老著書睹春官旌表節義事甚悉率多京畿內郡之民間閭幽遠蓋罕焉及讀陳助教繹曾作夏侯玉珍傳許許鄉善錄載許伯冬妻頗與汪夫人類皆節義卓卓羽翼名教朝廷著旌表之令以風勸天下而有司莫之省使至行鬱堙不顯白於世悲夫予弟為

平江幕官嘗言某帥妻詣官自陳願上所受封比齊民
得再嫁嗚呼以禮坊民猶有踰者若是哉予故論著汪
夫人之事以俟察民風者覽焉

程夫人李氏墓誌銘

貢師泰

婺源環溪程夫人生七十六年而卒卒五年而葬里之
爐源魚墩葬二十年為至正二十二年辛丑歲其孫致
和避地建寧聞予以使留三山乘小舟而下執其鄉先
生胡初翁所為狀來請曰致和祖母故宋潭州通判樂

平果堂先生李公睦之季女也因歸附後先生隱不仕
嘗過吾里見吾祖旅舍中與之論學而知其造詣也許
以夫人事焉吾祖諱良金字玉淵夫人既歸事舅姑以
孝遇姻族以禮處內外以和相夫教子克勤以順年三
十餘有二子四女長則先君諱萬善年甫十三而吾祖
歿諸孤輒然在髫稚中門戶單薄賴夫人以克樹立使
程氏子孫有田可耕有屋可廬知誦詩讀書以不流於
他業者皆夫人賜也夫人晚年尤好施與見鄉里飢餓

廢疾者輒戚戚不樂必思以濟之乃己己壬申二歲
亢旱父老徧禱不應衆兩請具夫人姓名祝告之果皆
大雨今吾里不幸陷於賊而致和又流散至此不得以
時展省墳墓顧思祖母恩德實痛于心願先生誌而銘
之候時清寧將歸刻諸墓焉致和善學而敦行予與其
從父禮部員外郎文為通家友而江東所值患難又相
同聞斯言也能不悵然為之興感乎遂銘不辭銘曰

鄙李季女于程之從於母有儀於婦有容副笄童童執

奠于宗盛年而婺眉壽而終維爾子孫孝思無窮既垣
既封亦拱其松刻銘墓道庶永休風

新安文獻志卷九十八